

Incumbensa da la fracziun da la PPS concernent ina clausula davart il nivel dals pretschs / avantatg per indigens

Il zercladur ha il parlament a Berna concludì novas reglas per las acquisiziuns. Quai en consequenza dal fatg ch'igl è vegnì public avant in pèr onns che la Confederaziun vul laschar montar fanestras novas en la Chasa federala ost per 1,5 milliuns francs. Quellas derivavan bainchapi da la Tschechia, perquai che purschiders svizzers n'han betg pudì concurrer cun ils pretschs bunmartgads. Sch'ina firma da l'exteriur concorra per incumbensas tar la Confederaziun, vegn resguardà il nivel dals pretschs da là. Sch'il nivel dals pretschs è 20% pli bass ch'en Svizra, sto er l'offerta esser 20% pli favuraivla. Quai correspunda facticamain ad in avantatg per indigens, u ditg cun auters plects, las premissas betg egualas vegnan gulivadas uschia in zic. Tar la Confederaziun sa tracti tuttina d'in volumen dad 8 milliardas francs. Bler pli grond è però il volumen d'acquisiziuns dals chantuns e da las vischnancas, numnadamain ca. 32 milliardas francs.

Displaschaivlamain na parta la Regenza betg l'opiniun da la Confederaziun ed ha resalvas giuridicas. Nus da la fracziun da la PPS na chapin betg la tenuta da la Regenza. Il cuntrari, qua ha la Regenza pers cumplettamain il sentiment per la mastergnanza. Nus da la fracziun da la PPS essan da l'avis che quai fiss ina buna occasiun per proteger nossa mastergnanza. Perquai che gist las regiuns perifericas u meglier ditg las regiuns da cunfin pateschan gea il pli fitg dal squitsch da firmas da l'exteriur. Er lavurantas e lavurants profitassan, pertge che quai faschess frunt al squitsch sin las pajas. Eventuals custs supplementars per las vischnancas e per il chantun returnassan en furma da taglias, perquai che la chadaina da valorisaziun resta en Svizra e na vegn betg exportada a l'exteriur. Quai gidass er il clima, essend che las vias da transport vegnissan essenzialmain pli curtas. Supplementarmain vegniss rinforzada tras quai la finamira d'armonisaziun tranter la Confederaziun ed il chantun.

Pervia da quai inoltrescha la fracziun da la PPS dal Grischun l'incumbensa d'elavurar ils suandants puncts:

- Ina preschentaziun generala che tegna quint dal problem descrit qua survast.
- In sboz da lescha che protegia la mastergnanza indigena cunter firmas invasivas da l'exteriur.

Cuira, ils 12 da favrer 2020

Gort, Brandenburger, Della Cà, Dürler, Favre Accola, Hug, Koch, Salis, Jegen